

**NO TIN MOTIBO DI
PREOCUPACION PA
ARUBA RELACIONA CU
HANTAVIRUS**



WWW.SOLODIPUEBLO.COM



SOLODIPUEBLO@GMAIL.COM

BENNY SEVINGER TRANSFERI DIAHUEBS MERDIA PA KIA



**Despues di 10 aña:
UN TANKERO
GIGANTE A MARA
NA CURACAO PA
HIBA 2 MIYON BARI
DI PETROLEO!**



Awo cu 2 florin mas, bo por gana e MEGA PLUS

***Afl. 1.400.000,-**
*Afl. 400.000,- + Afl. 1.000.000,-
extra



HUNGA AWO



Benta ta sera 7:30 pm y sorteo ta hunga 7:45 pm

NO TIN MOTIBO DI PREOCUPACION PA ARUBA RELACIONA CU HANTAVIRUS

ORANJESTAD, Aruba – 7 mei 2026: Directie Volksgezondheid (DVG) ta informa comunidad cu actualmente no tin ningun motibo di preocupacion pa Aruba relaciona cu hantavirus.

Hantavirus no ta un virus nobo. E virus aki ta conoci den sector medico internacional pa hopi aña. Recientemente a keda raporta na World Health Organisation (WHO) algun caso abordo di e cruise MV Hondius, loke a haci cu hopi informacion y preocupacion a cuminsa circula riba red social y otro plataformanan.

DVG ta informa cu pa Aruba no tin ningun menasa directo, e barco ta ubica leu for di Aruba y autoridadnan competente ta sigui monitor e situacion y ta eherciando nan investigacion.

Hantavirus ta un zoonosis cu por wordo transmiti di animal pa hende door di contacto cu orina, feces of saliva di cierto tipo di animal rastrero manera raton infecta. Den mayoria di caso, e virus no ta transmiti facil di persona pa persona.

Actualmente no tin ningun caso registra na Aruba y animalnan rastrero manera raton y jaca na Aruba no tin e virus aki.



Directie Volksgezondheid ta sigui monitor constantemente tur desaroyo internacional y regional cu por tin impacto riba salud publico di Aruba manera e aumento di casonan di Keintura Geel, Chikungunya y Sarampi den diferente pais den region.

DVG ta trahando constantemente riba plannan di contingencia pa por responde liher si Aruba

confronta algun situacion similar. Pa loke ta hantavirus, comunidad por keda trankilo. Cu DVG ta monitor, sigui tur desaroyo y midi tur factor di riesgo relevante pa cu salud publico pa por proteha e bienestar di pueblo di Aruba.

Bo Salud, Nos Prioridad

Pa mas informacion, like

nos Facebook page Directie Volksgezondheid DVG Aruba, follow nos riba Instagram [directie_volksgezondheid_aruba](#), sigui nos den WhatsApp Channel, ricibi tur informacion den Aruba Health App, bishita [www.dvg.aw](#), yama 5224200 of manda email na servicio@dvg.aw

AUNKE NO TA HAYA E MANTA DEN NOS AWA TERITORIAL, E TA PROTEHA PA NOS LEYNAN LOCAL



Parlamentario Endy Croes: MAS DI 400 DIA Y NI UN SOLO CAMINDA! MEP A LAGA 18 MIYON FLORIN APROBA PA CARETERA

Parlamentario Endy Croes a duna un resumen riba e reunion Publico recien, unda Parlamento a trata e presupuesto di DOW pa aña 2026. Durante e debate, Minister Baba Herdé tabata musta basta cansa y no tabata brinda e informacionnan nesesario. No obstante, Fraccion di MEP a keda insisti pa por logra haya algun contesta for di e mandatario, pa asina cumpli debidamente cu e responsabilidad di controla gobierno.

Presupuesto di DOW pa 2026

E presupuesto total pa DOW pa e aña 2026 ta un suma di 52 miyon florin. E fondo aki ta reparti den e siguiente categorianan:

- 17 miyon florin: Destina na gasto di personal, incluyendo e contribucion di dunado di trabou (werkgeversbijdrage).
- 35 miyon florin: Destina na bienes y servicionan (goederen en diensten).

Un punto di discordia fuerte tabata e destino di e 18 miyon florin cu e gobierno anterior (MEP) a laga presupuesta pa mantencion y construccion di caretera. E Fraccion di MEP a confronta Minister Herdé na dos ocasion riba kico a pasa cu e 18 Miyon florin aki, pero e mandatario no por a duna un contesta cla. Increíblemente, Minister Herdé a pretende cu no tabatin plan pa esaki y a nenga cu e suma ey tabata existi den presupuesto.

Minister NO a lesa su propio documentonan

Parlamentario Croes mester a corigí Minister Herdé den sala di Parlamento, usando e mesun documentonan cu e Minister a manda dia 20 di februari 2026. Den e Memorie van Toelichting (Pagina 15) y e Master Plan DOW, ta para claramente:

“Eind 2024 is via de najaarsnota een bedrag van 18 miljoen gereserveerd voor de realisatie van de omzetting van bestaande zandwegen naar asfaltwegen en het bestaande asfaltwegen, in lijn met het Masterplan van DOW”. Pues den e ley y e documentonan cu Minister mes a manda Parlamento, e 18 miyon ta wordo confirma.

Con por ta posibel cu Minister Herdé ta splica cu No tin plan y No tin placa? Unico cos cu a pone nos pensa ta cu Minister mes no a lesa su documentonan cu e Departamentonan a prepara p’e, prome cu el a bin Parlamento. Croes a lamenta cu e mandatario no ta domina e materia y aparentemente no a prepara debidamente, faltando respet na e trabou di e departamentonan cu a prepara e documentonan aki.

Recorte di 18 miyon riba prome dia di gobernacion

Dia 28 di Maart 2025, gobierno AVP-Futuro a huramenta y e mesun dia a bin Parlamento pa trata cambianan den presupuesto 2025. E dia aki bou instruccion di Minister Geoffrey (Futuro), e Parlamentarionan “nobo” sin lesa nan documentonan a vota pa



corta:

- 18 miyon florin di presupuesto di DOW
- 20 miyon florin di FCCA
- 6 miyon florin di Husticia
- 3 miyon florin for di fondonan pa subsidia stichtingnan
- 3 miyon florin di Enseñansa

Tur e fondonan aki lo mester a bay den un “fondo di inversion” cu, segun Croes, te awe no a wordo lanta oficialmente.

Minister Herdé a splica cu awo cu el a pidi Minister Geoffrey Wever pa pasa 7 miyon florin bek di e “investeringsfonds” pa DOW. Pues AVP a entrega e 18 miyon florin di caretera na Futuro y awo e partido grandi (AVP) mester “yora” serca e partido chikito (Futuro) pa haya un limosna pa drecha caretera. “Asina no ta goberna un pais,” e

parlamentario a finalisa. Croes ta lamenta cu despues di mas di 400 dia di gobernacion AVP-Futuro, no a inverti ni un solo florin den nos careteranan.

Aruba merece miho!

Clasificados




SOLODIPUEBLO@GMAIL.COM

CEL.585 9500



MINISTER DOWERS TA PARA FIRME PA ORDEN Y SIGURIDAD DEN TRAFICO



Dia 21 di april 2026, Minister di Husticia, Integracion, Transporte Publico y Energia, mr. drs. Arthur Dowers, durante di un conferencia

di prensa, a anuncia su maneho nobo relaciona cu e uzo ilegal di vehiculonan electrico manera E-Steps, E-Bikes y E-Scooters riba camindanan publico. Pareu



cu e anuncio aki, minister Dowers a indica cu lo duna e companianan cu ta haci negoshi cu e vehiculonan aki, e oportunidad pa kita esakinan for di espacionan publico.

Algun dia despues di e anuncio publico aki, un di e operadonan a bira conoci pa Gobierno, na momento cu nan a entama un caso sumario contra e maneho di Minister Dowers. Despues di casi dos siman, riba diahuebs 29 di april, autoridad a kita tur vehiculo electrico no autorisa cu a haya explicitamente riba tereno publico den area di hotel y e mesun operado, pa medio di su abogado, a pidi huez un "ordemaatregel" pa haya su pertenencianan bek cu autoridad a tuma "in bewaring" e mainta ey.

Prome cu a entama e caso sumario, ningun instancia relevante tabata

sa ken ta opera e cantidad di vehiculo electrico riba espacionan publico mirando cu ningun di e vehiculonan aki ta registra, tin seguro of a pasa inspeccion tecnico y sigur no tin permiso pa por haci negoshi cu e vehiculonan aki.

E decision di Minister di Husticia mr. drs. Arthur Dowers pa no sigui tolera e caos cu e minister di husticia anterior a permiti, no ta basa riba sentimentonan emocional sino basa riba leynan concreto y consejo di un comision di siguridad den trafico cu a traha desde aña pasa riba solucionnan practico. E comision di siguridad den trafico ta consisti di expertonan huridico di Ministerio Publico, Departamento di Inspeccion Tecnico (DTI), Departamento di Legislacion y Asuntonan Huridico (DWJZ), Cuerpo Policial y funcionarionan

di Ministerio di Husticia.

Cu e decision temporal di huez pa entrega e vehiculonan aki bek na e doño, huez no a duna e doño luz berde pa verhuur esakinan sin mas, mirando cu a enfatisa den e "ordemaatregel" cu autoridad tin e opcion pa atende cu usarionan di e vehiculonan aki na momento cu nan ta riba camindanan publico, pues a hala e responsabilidad pa e usuario.

No obstante e decision temporal aki, Minister Dowers ta para firme pa su decision pa trece orden bek den trafico y ta warda riba e decision di e "caso sumario" cu lo tuma luga diabierna dia 8 di mei. Hunto cu e expertonan den e comision di siguridad den trafico, ta sigui traha na bienestar di siguridad y orden den trafico.


BENNY SEVINGER TRANSFERI DIAHUEBS MERDIA PA KIA

Oranjestad – Diahuebs 7 di mei 2026, Benny Sevinger a wordo transferi oficialmente pa e prizon di KIA na Aruba despues di pasa tres anochi den Warda di Polis di San Nicolas pa diferente screening medico y evaluacion di salud. Fuentenan anonimo a confirma cu e proseso medico tabata necesario prome cu e por a wordo admiti formalmente den institucion coreccional.

Sevinger ta relacions cu e caso grandi conoci bou di nomber “Avestruz”, un investigacion criminal cu a trese hopi atencion

publico den añanan pasa. E caso tabata enfoca riba sospechanan di fraude, corrupcion, falsificacion, soborno, y otro actividadnan criminal cu tereno di pueblo. Tabata faborece amigonan y despues amigonan tabata dune regalo na valor di 900 mil florin.

Den e investigacion “Avestruz”, varios sospechoso a wordo deteni y procesa. Autoridadnan hudicial a indica cu e caso tabata uno di e investigacionnan criminal mas grandi na Aruba den ultimo temponan.



Awor cu Sevinger ta den KIA, e lo sigui bou di supervision di autoridadnan di e institucion, unda e lo mester pasa algun año, cumpliendo castigo segun corte di beroep na Aruba confirma pa Cassatie na Hulanda.

Despues di 10 año: UN TANKERO GIGANTE A MARA NA CURACAO PA HIBA 2 MIYON BARI DI PETROLEO!

WILLEMSTAD – Diaranson tabata un dia historico pa Curacao. Un VLCC (un barco petrolero masha grandi mes) a mara na e waf di 2BAYS Curaçao. Tabata for di 2016 cu Corsou no a mira un monster asina den su haf pa motibo di petroleo.

E datonan cu bo mester sa:

E Carga: E barco ta bay cu 2 miyon bari di crudo cu tabata almacena na Bullenbaai.

Destino: E petroleo ta bay leu, pa paisnan manera China, India y Europa.

E Tamaño: E barco tin e largura di 3 veld di futbol tras di otro!


Dicon Curacao?

Bullenbaai ta un di e poco lugarnan cu tin e awa asina hundo cu barconan di e tamaño aki por mara facilmente. Trahadonan di CRU y contratistanan local a traha duro pa prepara tur cos, y cu yudansa di KTK, e yegada a bay exitoso.

Esaki ta un stap grandi pa e economia di Curacao y ta habri porta pa mas barco gigante bishita e terminal e año aki mes!



Na caminda pa Mundial



ALARMA RIBA CAPACIDAD DI AICM COMPARA CU OTRO CIUDADNAN SEDE


Segun specialistanan den aviacion, Aeropuerto Internacional di Ciudad de México (AICM) ta den un careda contra holoshi. Mientras cu sedenan manera Guadalajara y Monterrey ta muestra un infraestructura mas solido y prepara, e porta principal di entrada di e pais ta wordo cuestiona pa su falta di inversion cronico.

Duda riba e resiliencia di e Capital

Durante e presentacion di un analisis recién riba riesgo aeroportuario, e experto Víctor Hugo Valdes a pone den duda si e capital Mexicano realmente por soporta e avalancha di fanatico cu e Copa Mundial di FIFA lo trece cu ne. Valdes a señala cu, compara cu e aeropuertonan maneha pa inversionista priva den e provincianan, AICM a negligisha su mantencion pa demasiado tempo.

"Nan ta haciendo reparacionnan basico aworaki cu mester a wordo haci for di hopi año pasa," Valdes a declara, refiriendo na trabounan di mantencion cu el a observa personalmente.

Inversion priva vs. crisis den capital



E contraste ta bisto:

* Guadalajara y Monterrey: Maneha pa gruponan priva cu capacidad di expansion y miho preparacion logistico.

* AICM: Un reduccion operativo di casi 30% (pasando di 61 pa 44 operacion pa ora) y un infraestructura cu ta purba di "remodela" net prome cu e evento mas grandi di mundo.

Loke tin den wega

Cu e proyeccionnan di e Federacion Mexicano di Futbol indicando un impacto economico di \$3.000 milyon, e expertonan

ta bati alarma: cualkier fayto den e sistema aereo no solamente lo afecta e experiencia di e 5,5 milyon di bishitante spera, sino tambe e desaroyo regional y comercial di e pais.

E conclusion di e specialistanan ta cla: México no por permiti su mes tuma decision a base di informacion incompleto ora cu henter mundo lo tin su wowonan riba e pais.

Clasificados

🚗
🏠
🛒
📞
🔨
👤

SOLODIPUEBLO@GMAIL.COM

CEL. 585 9500

Na caminda pa Mundial

2026

IRÁN TA EXIGI GARANTIA DI FIFA PA PARTICIPA DEN MUNDIAL NA MERCA


E tension geopolitico ta drenta tereno di wega. Mehdi Taj, presidente di e Federacion di Futbol di Irán (FFI), a declara cu e participacion di su seleccion den e Copa Mundial di 2026 ta depende di "garantianan concreto" cu FIFA mester duna. Segun e dirigente, mester sigura cu no lo tin "insulto" contra e institucionnan oficial y militar di Irán durante nan estadia na Merca.

Condicion pa bishita suelo Americano

E lider di futbol iraní a enfatisa cu e presencia di su pais den e torneo ta mara na un reunion cu e presidente di FIFA, Gianni Infantino, cual lo por tuma luga pronto na Zúrich. Taj a reclama un "respeto absoluto" pa e delegacion Iraní y a adverti riba e consecuencianan si esaki no wordo cumpli.

"Nos no lo tin problema pa asisti si no presenta ningun tipo di insulto, specialmente contra e institucionnan oficial y militar di nos pais," Taj a afirma, haciendo referencia implicitamente na e Guardia Revolucionario, cual Merca ta considera un organisacion terrorista.

E advertencia ta bay mas leu: Taj a



menciona cu, si e delegacion sinti nan mes insulta, nan lo duna un "contesta proporcional" y hasta tin e posibilidad cu e seleccion lo bandona e competencia pa regresa nan pais.

Antecedente na Canada

Taj, kende tabata miembro di e Guardia Revolucionario, a uza su experiencia reciente na Canada como ehempel. El a relata cu durante su biaha pa e di 76 Congreso di FIFA na Toronto, el a dicidi di regresa Irán despues di a sufri "insulto" na inmigracion.

No obstante, medionan Canades a reporta cu e realidad tabata cu el a wordo deporta debi na su pasado militar.

E postura di FIFA y Merca

A pesar di e tensionnan, Gianni Infantino a reitera su optimismo:

Union global: Infantino a confirma cu "Irán lo hunga na Merca", argumentando cu e meta di FIFA ta pa uni mundo y keda positivo.

Conflicto diplomático: Irán y Merca tecnicamente ta den un

estado di guerra desde februari, maske actualmente tin un tregua vigente.

Por ultimo, e Secretario di Estado di Merca, Marco Rubio, a aclaria e posicion di Washington: e hungadonan lo ricibi permiso pa drenta y hunga nan partidonan na Santa Clara y Seattle, pero e entrada lo keda prohibi pa e personal tecnico di e federacion cu tin lasonan confirma cu e Guardia Revolucionario.

Irán, cu a clasifica como lider di Grupo A den e zona Asiatico, ta cuadra den Grupo G hunto cu New Zealand, Bélgica y Egipto.

AWE TA BO OPORTUNIDAD DI GANA 1.4 MIYON CU MINI MEGA Y MEGA PLUS!

ORANJESTAD, Aruba – 8 di mei 2026: Diamars anochi e resultado di Mini Mega a ser conoci, unda cu e numbernan cu a sali tabata 06-08-09-18 y Mega Ball: 10 y no tabata tin ganador pa e prome premio. Segundo premio a conoce un total di 2 ganado cu tabata tin e 4 numbernan bon, pero sin e Mega Ball. Ticketnan ganado a wordo bendi na Super Food y Oficina di Lotto Oranjestad. Cada un ganado a gana e suma di Afl. 22.487,-.

Si tin un ganado awe nochi, e lo bira e tercer miyonario pa aña 2026! E prome miyonario di 2026 tabata na februari cu a gana e suma di Afl. 1.750.000,- y e ticket ganado a wordo bendi na Lucky Cher-Ann 2. E segundo miyonario a gana solamente e jackpot di Mini Mega cu e bunita suma di Afl. 1.300.000,- y e ticket ganado a wordo bendi na RS Lottery.

Awe diabierna 8 di mei 2026, Mini Mega su jackpot ta na 400 mil florin y cu 2 florin mas,

bo por gana e jackpot di 1 miyon florin extra cu ta pone e suma bira un total di 1 miyon 400 mil florin! Bo no tin bo cuenta di Lotto Online ainda? Bay riba play.lottoaruba.com y registra pa asina bo por compra bo Lotto Online.

Lotto, E Loteria di Aruba tin diferente wegá, Catochi, Big 4, 1-OFF, Zodiac, Wegá di Number di Korsou di Lotto, Lucky 3, Multi-X, Lotto di Dia, Lotto 5, Mini Mega y cu su Mega Plus y e diferente weganan di Raspa y Gana y Instacash.



Cumprando Lotto bo ta contribui na deporte riba nos isla.

E meta ta pa organisa loteria, cambia bida di

su hungadonan y na mes momento inverti den deporte local pa medio di donacionnan na e comision di subsidio.

JOEY FRANCISCO A GRADUA COMO BACHELOR DEN ORGANIZATION, GOVERNANCE AND MANAGEMENT (OGM)

Riba diaranson 22 di april 2026, Joey a defende su tesis exitosamente y a obtene e titulo di 'Bachelor of Arts' for di e programa Organization, Governance and Management for di e Facultad di Arte y Ciencia. Joey a defende su tesis 'Building the Bridge Between Anti-Doping Perception and Action' dilanti di e comision di graduacion cu tawata consisti di Nurianne Arias, MSc, Niels Wiskerke, MA y Marushka Sarah Lee-Tromp, MSc. Ademas tabata presente manager di e programa OGM, Ahmet Talan, MSc, famia di Joey Francisco, docente

di Universidad di Aruba y colega di estudio tambe tawata presente.

Joey Francisco a investiga e efectividad di Aruba su iniciativanan di anti-doping bou di educacion, cumplimento di regla y participation den investigacion segun e percepcion di atleta, personal di sosten pa atleta (ASP) y representante di organisacion deportivo.

Un di e recomendacionnan ta pa introduci educacion tocante anti-doping mas trempa pa e atletanan y adapta esaki a base di cada e necesidadnan

di cada grupo di atleta. Otro recomendacion ta pa colabora mas cu Universidad di Aruba y otro instancianan educativo pa desaroya e capacidad di investigacion pa cu anti-doping.

Ta gradici e docentanan di e departamento di OGM y profesional cu a yuda of guia Joey como estudiante. Tambe ta gradici tur esnan na y pafo di Universidad di Aruba cu a contribui na un manera of otro na e acontecimiento aki.

Pa mas informacion tocante e estudio OGM, bishita e website di



Universidad di Aruba na <http://www.ua.aw/ogm>, e pagina di Facebook @

UniversityofArubaOGM y e pagina di Instagram @ua_ogm.mgl.

IBEROSTAR HOTELS & RESORTS TA REFORSA SU COMPROMISO CU MEDIO AMBIENTE PA TEMPORADA DI TURTUGA MARINO

Eagle Beach, Aruba – 6 di mei, 2026 - Iberostar Hotels & Resorts ta sigi reforsa su compromiso cu e proteccion di medio ambiente pa medio di iniciativanan enfoca riba e ecosistemanan di costa na Eagle Beach, cu un enfoque special riba conservacion di turtuga marino. Como parti di e esfuersonan aki, miembronan di e ekipo di Iberostar a participa recientemente den un sesion di entrenamiento specialisa, coordina pa TurtugAruba, tocante concientisacion y conservacion di turtuga marino. Iberostar ta agradecido pa e conocimiento valioso comparti, locual ta prepara e personal pa informa y guia huespednan mihor riba con pa observa y proteha turtuganan marino di un manera responsabel durante nan bishita na e isla, y tambe kico ta e pasonan necesario pa tuma ora ta topa cu un turtuga. E entrenamiento aki ta duna e personal e conocimiento pa guia huespednan tocante e diferente especienan manera e Driekiel (Leatherback), Karet (Hawksbill), e Turtuga Blanco (Green sea turtle), y e Cahuet (Loggerhead). Tambe e entrenamiento ta reforsa e importancia di apoya e proceso di broei di turtuga pa medio di practicanan manera e kitamento di stoel y material di beach tur anochi y e uzo di luz cu ta amigabel pa naturalesa, uzo di luz abou, y mantene esakinan tapa.

Cu e temporada di broei di turtuga marino den porta, Iberostar ta brinda sosten na e importancia di comporta di un manera responsabel riba e beachnan di Aruba. Parkeer of core auto riba santo, mescos cu para den areanan di neishi, por tin un impacto serio riba e habitatnan fragil aki y por stroba e actividad di broei. Ta

urgu tur huesped y bishitante di e beach pa keda atento, evita di core auto riba beach, y respeta e medio ambiente natural durante e periodo critico aki.

Turtuganan marino ta un parti vital di e ecosistema marino di Aruba. Especienan manera e Driekiel, cu ta broei riba e costanan di e isla, por crece te cu 2 meter di largo y pisa te cu un tonelada. E temporada di broei ta core di maart pa september, cu e hatchlings (turtuga baby) saliendo for di neishi entre mei y november. Considerando cu solamente 1 di cada 1,000 hatchlings ta yega edad adulto, proteccion di e especienan aki ta esencial.

Ta pidi bishitantenan pa mantene un distancia safe, evita luznan fuerte, keda tranquil, y nunca interferi cu e turtuganan ora nan ta broei of cu nan habitat. Iberostar ta enfatisa tambe na su personal y huespednan e importancia di respeta e barricadanan y areanan di neishi marca, cualnan ta esencial pa proteha tanto e turtuganan como nan webonan.

Iberostar Hotels & Resorts tin un compromiso di hopi tempo cu turismo responsabel, formando parti di un grupo cu mas di 70 aña di experiencia den e sector di biahe y un enfoque fuerte riba cuidu ambiental. Desde e lansamento di e movimiento Iberostar Wave of Change na 2017, e compania a traha activamente pa proteha ecosistemanan costal y biodiversidad marino pa medio di iniciativanan basa riba ciencia y alianzanan local. Esaki ta inclui apoyo na programanan dedica na conservacion di turtuga marino, manera e alianza di hopi aña entre Iberostar y Proyecto TAMAR



na Brazil, cu lo celebra su di 20 aniversario na 2026.

Pa medio di e esfuersonan aki, Iberostar ta contribui na e proteccion di e habitatnan di broei y ta lanta concientisacion riba e importancia di preserva bida marino. E compromiso a largo plaso aki ta refleha e vision amplio di e compania pa crea un impacto positivo riba e salud di oceano y inspira tanto huespednan como comunidannan pa bira guardiannan activo di naturalesa. Iberostar Hotels & Resorts

Iberostar Hotels & Resorts ta e division hotelero y e negoshi principal di Iberostar Group, un multinacional Spaño cu ta 100% propiedad di famia cu 70 aña di experiencia den sector turistico, cu origen empresarial cu ta bay te 1877. Su portfolio ta inclui 33,500 camber den 100 hotel di cuater y cinco strea den 14 pais, dedica na ofrece un calidad excepcional y un servicio sincero. Na mesun

momento, e ta mantene un modelo di turismo responsabel cu tin como prioridad e bienestar di tanto hende como naturalesa.

Cu 2.5 miyon bishitante pa aña y un presencia privilegia den prome liña di lama, e marca Iberostar Beachfront Resorts ta ofrece tres segmento distinto pa cumpli cu e deseonan di vakantie di tur biahero. Iberostar Waves ta ofrece experencianan yen di diversion, perfecto pa famia y pareha cu ta stima lama. Iberostar Selection ta brinda estadianan premium, espacioso y relahante cu un servicio excepcional. Por ultimo, JOIA by Iberostar ta un coleccion di resortnan di lujo den localidadnan exclusivo, distingui pa un servicio altamente personalisa y sofisticado. * E portofolio di Iberostar Beachfront Resorts ta exclui su interesnan na Cuba.

Pa mas informacion, por tuma contacto cu ekipo di Comunicacion Corporativo na: ghislaine.dewindt@iberostar.com

ODEA TA FELICITA TUR NURSE TRAHANDO NA ARUBA

cu nos siman di enfermeria (NNW 2026):

Our nurses. Our Future. Empowered nurses save lives.

Nos nursenan. Nos futuro. Nursenan empodera ta salva bida

International Counsel of Nurses (ICN) e aña aki a scohe como tema pa Dia Internacional di Enfermeria :

"Nos nursenan. Nos Futuro. Nursenan empodera ta salva bida."

Tur dia, nursenan ta salba y mehora e calidad di bida. Nan impacto ta mas grandi ora nan ta debidamente empodera. Na un momento di presion mundial extraordinario, e tema di Dia di enfermeria di e aña aki ta enfoca riba haci e cambionan structural necesario pa probecha di e poder di e forsa laboral di enfermeria. Basando riba e ultimo dos raportnan di ICN e Poder Economico di cuido y cuido pa nursenan ta fortalece economia. E tema nobo aki ta destaca e rol vital di e forsa laboral di enfermeria pa mehora resultadonan di salud y entrega e cuido primario di confiansa, centralisa riba persona cu por transforma sistemanan di salud y atende e retonan di salud mas grandi di nos mundo.

Empodera no solamente den ta parti di tuma decisionnan den duna cuido, sino tambe den participa activo na momento di tuma decisionnan importante cu ta concerni salubridad publico di Aruba. Esaki ta significa banda di introduci un Arubig mester tin un plan di educacion pa garantiza cu e nursenan tin e posibilidad local di mantene nan nivel di educacion: "deskundigheidsbevordering", pa nan por mantene nan registracion den AruBIG.

Pa un nurse registra su mes den AruBIG ta fácil: tur persona cu ta eherce e profesion di nurse cu tin nan diploma di "Verpleegkunde, mbo-niveau 4, Hbo-V of "Nurse Practitioner", "verpleegkunde specialist" lo por entrega esaki y wordo acepta den AruBIG. E reto ta pa por re-registra. ODEA ta pidi pa tin un plan national pa e nursenan aki por bay cumpli cu e exigencia pa mantene nan registracion den AruBIG.

Introduccion di AruBIG ta di sumo importancia pa Aruba pa tur ciudadano por ta sigur cu esun cu ta duna e cuide ta un nurse diploma, capacida pa duna e cuido cu e ta duna, cu por jama su mes un nurse. Enfermera, enfermero, nurse ta un

titulo protehi cu no ta tur hende por jama nan mes: enfermera, enfermero, verpleegkundige, nurse, sin tin e diploma reconoci pa carga e titulo aki. Tur instituto di Aruba nan nursenan ta diploma. Nos tin cu segura cu tur cu ta duna cuido pafo di e institutonan aki tambe nan diploma ta reconoci den AruBIG.


E siman aki nos ta pone e lus ariba e: enfermera, enfermero, verzorgenden, verpleegkundigen, nurse. Un nurse no por funciona sin tur stakeholders den salubridad. Nos ta balora, aprecia y respeta cada un stakeholder den cuido pa na tremendo teamwork pa hunto duna e cuido cu tur persona merece, pero e siman aki nos ta pidi tur stakeholders pa e felicita e nursenan, pone nan den e lus den nan "siman di enfermeria".

E siman aki ODEA ta stimula tur estudiante den enfermeria pa busca un nurse pa bo combersa cu ne pa e por conta bo con su persona a bira un nurse, laga su persona stimula bo pa sigui inverti den bo estudia pa ta e futuro nurse nan di Aruba. Busca un buddy den enfermeria cu experiencia pa por sigui guia bo den bo estudio. Aruba mester di bo. Aruba mescos cu rond mundo tin un escasez den nurse pa cuida nos grandinan, den nos hospitalnan, cuido na cas, educacion.

Aruba, comerciante nan e siman aki ta e siman pa pone e nursenan den lus cu nan siman di enfermeria.

ODEA ta stimula tur nurse pa atende y disfruta di cada actividad cu institutonan a organisa specialmente pa boso e siman di enfermeria y comunidad esaki ta e siman cu comunidad por demostra cuanto nan ta aprecia nursenan cu ta duna e cuido den tur nos institutonan, cas di cuidonan, cuido na cas, sector priva, educacion y tur e otro areanan cu tin enfermeronan ta traha na Aruba.

ODEA ta invita tur hoben y adulto cu ta sinti nan mes yama pa duna cuido pa inscribi nan mes pa e opleidingnan di "Verzorgende IG" of "Verpleegkunde" pa asina bo tambe por cuminsa bo estudio pa bira un nurse. Nunca ta laat pa studia. Colegio EPI ta pa tur hoben y adulto cu ta desea di inverti den su mes y studia pa bira un profesional, pa studia pa bira un enfermera, enfermero, nurse. Aruba mescos cu



henter mundo tin un scarcedad di enfermera y enfermeronan diploma pa duna cuido.

Si bo ta un estudiante cu ta cabando bo Havo y te desea di studia pa bira un nurse, inscribi bo mes na Xavier Univertity pa bo studia bira un nurse.

Enfermeria mester abo cu tin e jamada "roeping" y amor pa cuida nos ciudadanonan di Aruba, den e momento cu mas nan tin mester: ora un quebante di salud bati na bo porta.

Pabien na tur Nurse di Aruba y Aruba ban muestra boso aprecia na nos Nurse na di Aruba

Clasificados

SOLODIPUEBLO@GMAIL.COM

CEL.585 9500

LA LEYENDA ISLAND SERIES 2026 TA TRECE UN EVENTO INTERNACIONAL DI CICLISMO NA ARUBA

Riba diaranson 6 di mei, a firma e contract oficial entre La Leyenda Island Series y Aruba Tourism Authority (A.T.A.), marcando un paso importante den e preparacion y ehecucion di e prome edicion di La Leyenda Island Series Aruba. Entre e representantenan presente tabata Ronella Croes, CEO di Aruba Tourism Authority, hunto cu demas representantenan di A.T.A., Brian Patrick Murphy O'Neill di La Leyenda Island Series y Jeanuar de Palm di The Caribbean Trail Legends Foundation y demas representantenan.

E evento lo tuma luga di 9 te cu 11 di october 2026, marcando e debut di e evento internacional di ciclismo aki na Aruba. E evento di tres dia ta parti di e serie global di 'La Leyenda Island' y ta wordo organisa den colaboracion cu A.T.A., reforsando Aruba como un destinacion cu ta enfoca riba turismo di bienestar y deportivo di calidad y balor duradero pa e comunidad.

E prome edicion lo consisti di un formato multi etapa, diseña pa resalta e paisahe varia di Aruba, incluyendo zona di costa, e interior di e isla y ruta cu tereno mixto. E evento ta integra e red di camindanan, esta trails di mountain

bike, cu recientemente a wordo desaroya y mehora na Aruba cu inversion di A.T.A. Di e manera aki, e infraestructura local ta wordo poni den centro di e experiencia di e evento, mientras cu ta promove uzo responsabel y conservacion di e trails a largo plazo.

E enfoque di e evento ta riba turismo di bienestar, cu ta combina actividad fisico, salud y conexon cu naturalesa, den linea cu interes creciente di bishitantenan cu ta busca experencianan deportivo y activo durante nan estadia. Principianan di sostenibilidad ta incorpora den henter e evento, cu enfasis riba operacionnan cu poco impacto y cuido di medio ambiente.

Ademas, La Leyenda Island Series Aruba 2026 ta posiciona Aruba pa atrae bishitantenan internacional cu interes den experencianan deportivo di varios dia, mientras cu ta stimula estadia mas largo y un conexon mas amplio cu e destinacion.

Mester menciona cu participacion di comunidad ta un elemento central di e evento. Organizacion y ehecucion ta wordo apoya door di e Caribbean Trail Legends Foundation Aruba, den colaboracion cu clubnan di

ciclismo local, partnernan local y boluntarionan. E enfoque colaborativo aki ta garantiza participacion local y un sentido di responsabilidad comparti, mientras cu ta fortalece cultura di ciclismo y infraestructura deportivo na Aruba.

“Cu La Leyenda Island Series Aruba 2026, nos ta sigui fortifica Aruba como un destinacion cu ta pone bienestar, deporte y sostenibilidad den centro di su oferta turistico. E evento no solamente ta atrae bishitantenan internacional, pero tambe ta crea balor pa nos comunidad, door di colaboracion local, uzo responsabel di infraestructura y un enfoque cu ta genera beneficio duradero pa Aruba,” segun Ronella Croes, CEO di A.T.A.

“La Leyenda Island Series Aruba ta mas cu un carera. Cu e apoyo firme di Aruba Tourism Authority, e evento aki ta e realisacion di un soño comparti y ta parti di nos meta pa sigui explora ubicacionnan nobo y konkista horizontenan nobo,” a bisa Brian Patrick Murphy O'Neill, Fundador di La Leyenda Race. “Nos ta cultiva un famia y comunidad global, creciendo di un manera unico, basa riba e balornan fundamental di mountain bike, pais pa pais. Aruba ta ofrece



un tereno excepcional, un cultura di ciclismo fuerte y un caluroso bon bini, haciendo e isla e cas perfecto pa nos proximo edicion di La Leyenda Island Series. Manera nos a bisa for di cuminsamento, nunca nos a kier bira e carera di mas grandi di

mundo, sino simplemente e mas stima.”

E registracion pa e evento lo habri oficialmente diabierna, 8 di mei 2026. Pa registracion y mas informacion, por bishita www.leyendaseries.com/aruba.

Parlamentario di AVP, Dennerich Kelly:

TRAHANDO RIBA MAÑAN: INFRASTRUCTURA TA PIDI VISION, DIRECCION Y CONFIANZA



ORANJESTAD (6 di mei 2026) - Durante e reciente tratamiento di e presupuesto di Servicio di Obra Publico (DOW) den Parlamento, miembro di Parlamento Dennerich Kelly a enfatisa cu infraestructura no ta un tema solamente tecnico, sino un realidad diario pa tur ciudadano di Aruba. “Infraestructura no ta algo cu hende ta pensa riba dje de bes en cuando,” Kelly a bisa, “pero ta algo cu tur hende ta sinti tur dia. Den e caminda pa traha, den siguridad di nos muchanan y den rapidez cu servicio di emergencia mester por yega nan destino.”

Segun Kelly, ta importante pa nos ta honesto riba e

situacion actual. Estado di camindanan, problema di awa den barionan y frustracion den comunidad ta visibel y reconoci pa tur hende. “E reto ta grandi y nos no por nenga esey, pero nos ta tuma esaki na serio,” segun Kelly.

Na mes momento, e ta pone enfasis cu e enfoka no mester keda solamente riba loke a bay malo. “E pregunta principal pa nos como pais no ta solamente kico a faya, sino con nos ta bay soluciona esey di forma structural.”

Kelly a indica cu un manera di trabou cu ta solamente reacciona riba problema, a largo plazo ta mas caro y menos eficiente. P’esey el

ta boga pa un cambio pa un sistema mas preventivo, cu planificacion cla y un vision a largo plazo cu por sirbi como base pa desaroyo duradero.

Durante su intervencion, Kelly tambe a menciona ehempel concreto for di diferente bario, manera Caya Frere Arnold y Alexius, Sabana Basora, Kas di Paloma y Ponton, unda residentenan ta sinti e impacto di problema di infraestructura tur dia. Na mes momento, el a expresa confianza cu otro bario nan tambe lo wordo inclui den e planificacion di DOW. “No ta trata di un solo bario, ta trata di henter Aruba,” el a enfatisa.




Ademas di su disertacion, Kelly a presenta un mocion den cual el ta pidi gobierno pa dentro di 30 dia presenta un overzicht cla y accesibel di tur proyecto di infraestructura planea pa 2026. Den e motie, el ta pidi informacion tocante presupuesto, meta y planificacion di cada proyecto, pa tanto Parlamento como ciudadano por sigui y compronde con ta traha cu fondo publico. Ademas, lo entrega un carta adicional pa fortalece e liña di transparencia y seguimiento di e proceso.

“Na final, ta trata di confianza,” Kelly a bisa. “Confianza cu gobierno no solamente ta haci plan, pero tambe ta logra resultado visibel pa pueblo.”

Cu su intervencion, Kelly ta posiciona su mes como un parlamentario cu no solamente ta identifica problema, pero cu ta busca solucion y colaboracion. “Pueblo di Aruba no ta spera perfeccion,” el a conclui, “pero nan ta spera progreso.”

TUMA ACCION PA PREVENI, PROTEHA Y STOP DENGUE CON NOS POR STOP DENGUE?



Parlamentario Shailiny Tromp-Lee: MOCION DI AVP TA DESMASCARA NAN MINISTER: “PRESUPUESTO 2026 TA BASHI Y SIN PLAN CONCRETO”

Motie no. 2, Fractie - AVP
 OV# 14, d.d. 5 mei 2026
 m.b.t. OLV# 1040
 PARLAMENTO DI ARUBA
 FRACCION DI AVP

STATEN VAN ARUBA
 Ingek: 4 mei 2026
 Volgnr: IS/992/25-26

MOCION

Parlamento di Aruba, den e reunion publico (OV) no. 14 "Ontwerp-landsverordening tot vaststelling van de begroting van de Dienst Openbare Werken voor het dienstjaar 2026 (IS/603/25-26, d.d. 20 februari 2026) (ZJ 2025-2026-1040)", riba fecha 5 di mei 2026, yama door di president di Parlamento, sr. A.M. Sneek.

Constatando cu:

- E presupuesto di Dienst Openbare Werken (DOW) no ta contene un bista cla y completo di proyectonan concreto pa aña di servicio 2026;
- Mester tin un conexcion directo visible entre e intencion di gastonan asigna y e proyectonan specifico;
- Parlamento mester por ehecuta su tarea di control di un forma efectivo riba e gasto di medio publico;
- E ciudadano den practica mester por mira mehoracion visibel den infraestructura y servicio;

Considerando cu:

- Transparencia y posibilidad di control ta condicion esencial pa bon gobernacion;
- Medio publico mester wordo usa di forma dirigi y comproba cu nan ta conduci na resultado concreto y medibel;
- Parlamento por ehecuta su rol di control solamente si nan dispone di informacion completo y cla;

Ta urgi Gobierno:

- Pa dentro di un periodo maximo di **30 dia** presenta un bista specifico di tur proyectonan plania cu DOW lo ehecuta den 2026;
- Pa cada proyecto indica claramente:
 - e presupuesto asigna;
 - e meta di e proyecto;
 - e fecha di comienzo spera;
- Pa haci e informacion aki accesibel tambe pa publico, pa asina tambe e ciudadano por haya bista riba e gasto di medio publico.

Y pasa na orden di dia.

Firma:



cero:

- Cero caminda asfalta.
- Cero transparencia den con ta gasta placa di pueblo.
- Cero plan concreto pa nos infraestructura.

E Minister a presenta un presupuesto bashi, sin substancia, strobando Parlamento di por eherce su trabou di control. E mocion ta bay asina leu di bisa cu mester tin un conexcion visibel entre gasto y proyecto, loke ta nifica cu actualmente, e Minister ta pidiendo placa sin por bisa exactamente kico e ta bay haci cun'e.

Ultimatum di 30 dia

E Fraccion di MEP a vota na favor di e mocion aki pasobra nos ta di acuerdo: e Minister mester bay Cocolishi, haci su trabou di

nobo y stop di gaña Pueblo cu bunita palabra. El a haya un ultimatum di 30 dia pa presenta e bista specifico cu e mesun fraccion di AVP a nota cu ta falta.

“Pueblo merece transparencia, seriedad y camindanan drechay sigur,

no solamente promesa den aire y mocionnan cu ta confirma incapacidad di un maneho bashi.

Aruba mester keda goberna na drechi!” - Parlamentario Tromp-Lee

Durante e ultimo reunion publico den Parlamento, a surgi un situacion remarcabel unda e propio Fraccion di AVP a dal nan Minister di Infraestructura un “sota” formal. Pa medio di un mocion cu a wordo aproba unanimamente, e fraccion berde a confirma loke Pueblo y Fraccion di MEP tabata bini ta bisa: e Minister ta papia hopi, pero no tin ni un bista cla, ni proyectonan concreto pa Aruba.

Un “Brevet van Onvermogen” den man di e propio fraccion

E mocion number 2 di e Fraccion di AVP ta papia

pa su mes. Den un acto incomprendibel (of pa falta di experiencia), e parlamentarionan di AVP a skirbi den nan mesun mocion cu e presupuesto di DOW “no ta contene un bista cla y completo di proyectonan concreto pa aña 2026.” Esaki no ta un critica di oposicion, esaki ta un confirmacion oficial di e mesun partidonan cu ta sostene e Minister.

403 dia: Cero caminda, Cero contesta

E realidad ta bisto, y e mocion aki ta djis legalisa e falta di maneho. Despues di mas di 400 dia den gobernacion, e resultadonan ta keda na

Clasificados

SOLODIPUEBLO@GMAIL.COM
CEL. 585 9500

SOPI DI LETRANAN

B	P	A	N	T	E	R	A	U	E	O	Y	I	S	J	R
Q	M	I	U	P	C	U	Y	O	I	Y	E	R	R	D	A
B	O	U	X	Y	A	E	W	F	E	L	K	B	I	D	T
Y	N	T	O	I	N	M	G	J	E	P	U	D	U	Z	Ó
Y	O	I	T	I	G	R	E	Y	R	Z	N	A	B	P	N
A	B	E	J	A	U	O	U	Z	R	E	Y	B	S	S	Q
R	N	K	P	T	R	B	I	O	U	B	F	J	A	A	G
C	I	E	E	D	O	F	I	U	A	R	K	L	E	Ó	N
J	B	E	R	D	Z	S	Z	U	G	A	U	Y	D	O	N
U	A	C	R	E	A	K	Y	A	U	D	V	C	E	T	A
V	F	A	O	S	U	F	Y	V	G	C	J	H	L	I	Y
X	G	S	G	A	T	O	H	E	I	U	T	Y	F	W	T
J	P	E	R	I	C	O	Q	E	J	E	E	S	Í	P	V
I	G	U	A	L	A	V	D	C	Y	A	T	G	N	Q	Y
C	U	E	R	V	O	L	O	Y	B	B	I	B	P	S	C
U	X	C	O	C	O	D	R	I	L	O	P	Y	T	S	A

- iguala

cuervo

perro

cocodrilo

delfín
- león

pantera

gato

perico

mono
- ratón

abeja

zebra

tigre

canguro

SUDOKU

	7		6					
	9		5		3		1	7
				1				
	8						4	3
		2				6		
4	5						7	
				3				
7	4		2		5		6	
					4		2	

	3	8	5	7			9	
	6			1		5		7
	1		3		9		8	
6	9	3		4		7		
2		4			5		6	1
				8			4	9
8			4			9		
3					8	6	7	
5	7		1					4

			8		1			
						4	3	
5								
				7		8		
						1		
	2			3				
6							7	5
		3	4					
			2			6		

Oracion di dia

Un feliz dia yena di hopi fe y speransa den nos bon Dios

”...sino conta e generacion venidero: esta gloria di Señor, su poder, ye cosnan milagroso c’El a haci.” (Salmo 78, 4bc)
E Evangelio di awe ta cuadra, manera semper, tempo cu ami tabatamucha. Mi mayornan semper tabata educa mi tocante di Dios, CristoHesus y Spirito Santo. Y un Bijbel no tabata haci falta. Haci oracionta cos di tur dia. Y sin falta bishita e cas di Dios.

Awendia nos ta ripara e generacion di awo, no tin mucho balor pa cuDios. Pero anos a sigui conta nos yiunan tocante di Dios manera nosgrandinan a haci? Anos a siña e hubentud tocante e milagronan ysacrificio cu Cristo Hesus a haci? Of di e donnan cu Spirito Santo tinpa nos? Y anos a tene man di nos yiunan, hibando nan, tur siman, pacas di Dios pa scucha su Palabra? Ban sigui cu e bunita custumber cunos grandinan a haci. Ban sigui hiba e futuro generacion ariba ecaminda cu Cristo Hesus a traha pa nos. ”...pa nan tambe confia denSEÑOR, no lubida Dios su obranan grandi...”(Sal 78, 7)
Oracion: Señor mi Dios motiva mi y guia mi, cu yudansa di SpiritoSanto, ariba mi responsabilidad pa conta y educa e generacion nobo di

Bo Maraviya.

Y inspira nan pa nan sigui conta na e siguiente generacion.

Amen.

Parlamentario Jennifer Arends-Reyes (AVP): GOBIERNO DI AVP-FUTURO TA ALOCA 19.4 MIYON PA DRECHA Y MANTENE INFRASTRUCTURA



ORANJESTAD (6 di mei 2026) – Parlamentario Jennifer Arends-Reyes a expresa su satisfaccion cu e presupuesto 2026 pa Departamento di Obra Publico (DOW), caminda cu Gobierno di AVP-Futuro a aloca un cantidad importante di 3.5 miyon pa DOW su gastonan y 15,6 miyon florin di diferente fondo adicional manera fondo di inversion, renobacion di bario pa drecha, renoba y mantene infraestructura riba Aruba.

Segun Arends-Reyes, e decision di asigna e presupuesto aki ta un señal cu AVP-Futuro ta tuma infraestructura na serio y ta pone e necesidadnan di pueblo Arubiano na prome lugar. “Infraestructura ta un fundeshi esencial pa nos desaroyo economico, siguridad di trafico, y

calidad di bida. Sin un mantencion serio, nos ta laga nos pais atras,” Arends-Reyes a declara.

E parlamentario a splica cu e 19,4 miyon florin lo bay directamente pa trabounan di mantencion y reparacion di caminda, drechamento di infraestructura deteriora, y otro proyectonan esencial pa comunidad. “Pueblo ta mira y ta sinti e dañonan riba caminda tur dia. Esaki no ta solamente un asunto di comodidad, pero tambe un asunto di siguridad,” Arends-Reyes a bisa.

Arends-Reyes a enfatisa cu durante e ultimo añanan, falta di inversion structural den mantencion di infraestructura a contribui na atraso grandi. “Awor AVP-Futuro ta mustra liderazgo y responsabilidad. E

presupuesto 2026 di DOW ta un paso concreto pa evita mas deterioro y pa yuda cu e atraso cu nos ta cargando.”

Fraccion di AVP a entrega 7 mocion cu ta duna contribucion na deseonan y posibel solucionan pa comunidad cu ta entre otro mas desaroyo riba nivel di mantencion na San Nicolas, drecha mas beach pa baha e concentracion riba beachnan popular, solucion pa parkeo den e area hotelero, bin cu fondonan adicional pa infraestructura, peticion pa rotonde pa cruzada peligroso, entre otro.

Tambe Sra. Arends-Reyes a trece dilanti varios pregunta y peticion pa atencion pa barionan manera Palm Beach, Rooi Afo, Tanki Leendert, Caya Frère Alexius, Kukwisastraat, scolnan, riolering cu por conecta cu Watty Vos Boulevard. Tambe a pidi pa agilisa proceso di permiso di construccion y pone mas personal pa yuda den DOW.

“Nos ta traha pa un Aruba mas fuerte, mas sigur y mas moderno. Infraestructura no ta un luho; infraestructura ta un necesidad,” Arends-Reyes a conclui.



Paardenbaaistraat 10, Oranjestad, Aruba Tel.: (297) 525 - 7555
www.lottoaruba.com
Resultado: Sorteo di Anochi - May 07, 2026

 Sorteo # 8840 9546 8921 7935 FP  Sorteo # 7884 6674 X2  Sorteo # 2589 2401  Sorteo # 6643 1956 Leo  Sorteo # 1573 365 	 Sorteo # 2694 0 x Jackpot 0 x Match 4+ 3 x Match 4 147 x Afl. 12,00	05-12-21-31-34 Joker 19 Letter H Proximo Jackpot 260.000,-
 Sorteo # 7172 0 x Jackpot 3 x Match 4 141 x Afl 8,00	02-14-18-21-25 Proximo Jackpot 51.000,-	
 Sorteo # 0 x Jackpot 0 x match 4 0 x Afl. 500,00 0 x Afl 50,00 0 x Afl.15,00	Mega Ball Proximo Jackpot 400.000,-	
 Afl 1.400.000,-		
 Sorteo #	Sorteo # 	



Paardenbaaistraat 10, Oranjestad, Aruba Tel.: (297) 525 - 7555
www.lottoaruba.com
Resultado: Sorteo di Anochi - May 07, 2026

 Sorteo # 8840 9546 8921 7935 FP  Sorteo # 7884 6674 X2  Sorteo # 2589 2401  Sorteo # 6643 1956 Leo  Sorteo # 1573 365 	 Sorteo # 2694 0 x Jackpot 0 x Match 4+ 3 x Match 4 147 x Afl. 12,00	05-12-21-31-34 Joker 19 Letter H Proximo Jackpot 260.000,-
 Sorteo # 7172 0 x Jackpot 3 x Match 4 141 x Afl 8,00	02-14-18-21-25 Proximo Jackpot 51.000,-	
 Sorteo # 0 x Jackpot 0 x match 4 0 x Afl. 500,00 0 x Afl 50,00 0 x Afl.15,00	Mega Ball Proximo Jackpot 400.000,-	
 Afl 1.400.000,-		
 Sorteo #	Sorteo # 	

MAN NA OBRA CU TRES PRIORIDAD PA E PARTI CARIBENSE DI E REINO

E seis islanan Caribense ta para dilanti reto urgente pa sigura crecemento economico y bienestar amplio pa futuro. Pa mehora e siguridad di existencia, laga e economia crece y fortifica e posicion di e islanan den e region, e Gabinete ta bay na obra p'esey cu tres prioridad. Esaki secretario di estado Eric van der Burg ta skirbi den e Carta di Maneho di Relacionnan den Reino. Secretario di estado Van der Burg:

“Habitante y empresario mester por conta cu un gobierno cu ta logra resultado y ta tuma paso concreto cu ta notabel den nan bida diario. Esaki ta e punto di salida cu ta duna direccion na ehecucion di e acuerdo di gobernacion pa parti Caribense di Reino. For di Den Haag nos ta compromete nos mes conhuntamente cu e paisnan y e islanan pa yega na resultado visibel pa e habitantenan. Maneho nobo na Hulanda Europeo lo wordo introduci basicamente na Boneiro, Sint Eustatius y Saba, a menos cu tin motibo di peso pa no haci esaki. Asina nos ta percura conhuntamente pa nos bay dilanti denter di Reino.”

Prioridad 1: Construi riba un gobernacion decisivo cu ta logra resultado

Hunto cu Boneiro, Sint Eustatius y Saba, e gabinete aki ta enfoca riba fortificacion di gobernacion publico: un gobierno decisivo y integro y cuadro legal cla. Ta sigui traha riba e accionnan cu a cuminsa cu e Agenda di Bon Gobernacion pa Hulanda Caribense, e revision di e leynan WolBES y FinBES y Ley di ampliacion di consehonan insular. Pa yuda preveni situacion preocupante manera esun na Selibon, gabinete ta fortifica capacidad di ehecucion y di gobernacion. E gabinete ta sigui



atende cu violacion di integridad, pasobra un gobernacion integro y fuerte ta base pa confiansa den gobierno. Asina, for di e aña aki, Boneiro, Sint Eustatius y Saba ta participa den e Monitor di Integridad y Siguridad. Servicio publico na Hulanda Caribense lo mehora mas ainda. Meta ta pa trece esaki na un nivel igual cu esun di Hulanda Europeo – online, via telefon y na bali.

Prioridad 2: Fortifica resiliencia social y economico y desaroyo sostenibel

E gabinete ta sostene desaroyo economico y autosuficiencia di e islanan. P'esey ta institui Plataforma di Economisch Groeiplatform Carib (Crecemento Economico Carib) pa conecta innovacion, empresario y capital na e seis islanan y den region miho cu otro. Banda di esaki, Instituto Nacional di Inversion cu ta bay institui nobo, lo habri pa parti Caribense di Reino. Esaki ta sosode den colaboracion cu

e ministerionan di Asuntonan Exterior, Asuntonan Economico y Finansa. Tambe ta bin un fondo cu cual empresario manera cunukero y piscado por haya acceso na financiamento pa, por ehempel, amplia nan negoshi. Pa atende cu pobreza na Boneiro, Sint Eustatius y Saba na un manera mas firme, gabinete ta pone €30 miyon structuralmente disponibel entrante aña 2027. E placa aki ta destina pa medida cu ta contribui na un minimo di existencia digno y na reduci e costo di bida.

Prioridad 3: Colaboracion efectivo denter di Reino

Si ta depende di e Gabinete lo bin un Conferencia di Reino pa probecha

miho di e oportunidadnan pa colaboracion cu Aruba, Corsou y Sint Maarten pa fortifica esakinan structuralmente. Esaki mester bira un combersacion recurente entre e cuater gobiernonan den Reino. Den esaki lo discuti desaroyo relevante, asunto y oportunidad pa colaboracion denter di Reino. Asina, por ehempel, desaroyo geopolitico por ofrece oportunidad nobo pa colaboracion regional, specialmente riba tereno manera energia, comercio y logistica.

E gabinete lo sigui elabora riba e prioridadnan aki den e proximo periodo, hunto cu e paisnan y e islanan.



PEN BEK

Pa kualkier informacion
solodipueblo@gmail.com
 of
 ☎ 585-9500